

戴密微先生八秩大慶祝壽專號

敦煌學

第一輯

敦煌學會編印

ÉTUDES SUR TOUEN-HOUANG

VOLUME I

VOLUME DÉDIÉ

À

MONSIEUR LE PROFESSEUR PAUL DEMIÉVILLE

À L'OCCASION DE

SON QUATRE-VINGTIÈME ANNIVERSAIRE

ASSOCIATION D'ÉTUDES SUR TOUEN-HOUANG

HONG KONG 1974

戴密微教授八十壽序

饒宗頤


夫道廣者邁種弘德，識深者妙植睿根。圓神之智，足藏往而知來；環得其倫，庶黃中以通理。故知玄嘿契畫水之隨合，靈府窺鏡月之虛銜；允宜照以慧炬，灌諸文瀾，儲美意以延年，守緣督而為寶。戴密微先生，以心捐道，因道通禪，早啟大乘起信之疑，晚證臨濟語錄之髓。巴利文惣那先比丘經之妙蘊，小乘法發南方上座部之輝光。空分十七，瑜伽盡眾護之圓成；律區廿二，明了揚真諦之風軌。若乃淵默雷吼，斷取莊嚴。方便通頓漸並育之津，壇經究心性直指之奧。出入隱顯，懸判深微。義林豈佛爾雅之比，非法雲之可攀；總持自造化窟之中，譬燃燈乎無盡。又

復稽拉薩禪法，挾唐蕃宗派之分殊，蒐粟持殘經，轉梵輪  
天北而不殆。雖康居之篆，有異六爻，贊普之書，全乖八  
體，而乃靈犀夕朗，柔翰晨鈔，蔚為吉光，拾茲翠羽。中  
歲橐筆華夏，拏舟刺桐，雙塔甫登，伽藍有記，酌南喬之  
菁華，留東雲之鱗爪。艸木之感，挹風露而芳香；氣類相  
從，同鼓鐘之應響。仍歲教肄旁施，生徒畢集，莫高委筵  
，比抵玉于崑山；宗海導涓，方潤珠于隋水。摩詰講經之  
變，梵志證道之歌，卧輪看心，南陽問答，皈依三寶，轉  
唱五更，齟齬新婦之書，入山辭娘之贊，所以防攝百行，  
宣明四諦，罔不樂為詮釋，正其乖舛。通解神悟，如湯盪雲  
夢于澄心；耽讀龍磨，幾絕韋編于涼燠。自像教西被，文  
思東洽，布護之勤，提喚之力，未有如公之卓絕者也。格

義非遙，玄奧是尚。漆園之危言日出，時亦和之以天倪，  
壺子之杜吾德機，鄉且示之以地理。涵泳止水之審，息心  
九瓊之淵，企石以挹飛泉，攀林而摘卷葉，虛泛徑千載之  
上，崢嶸非一朝之期，覽溟漲之無涯，悟虛舟之有託。遂  
知山水共交藻旂輝，神理與名教競爽。晚歲傾心康樂，恨  
足跡之未及永嘉；弔友廬陵，詠招提似聞諸鄰笛。感人深  
矣，能事盡矣。側聞古之善為學者，如大禹治水，百川會  
同。工為文者，猶常山之蛇，救首救尾。老子有言，以正  
治國，以奇用兵，以無事取天下。而學人者，以正存思，  
以奇振采，以無誤信天下。管籥所在，中外一揆，於先生  
見之。頤謬託賞音，早荷褒采。蓬門瞥記，藉高軒之一言  
；石窟聲詩，賴傳譯於四海。疇昔黑湖遊旅，屢接履綦。

途次嘗告頤曰，向耽釋典，深感燃藜之苦多，晚涉文圃，方寤玳鱗之斯在。以公道術之深，而樵謙若是，固知孫武韜內，不獨九天，張華腹中，何止萬戶。斯所枚舉，事同蠡測，譬諸燭火宵出，奚足擬東井之光，學鳩投枋，又安識南溟之廣。古之大椿，以八千歲為春，八千歲為秋，公期頤在望，大業日新，凡茲雅尚，彌表耆德，信彭祖以久特聞，想山棲之喜無量。綴丹青畫矣，久而愈鮮，使繫辭命之，言而不盡云爾。

太歲在闕逢攝提格孟陬之月饒宗頤盥手拜序



敦煌學第一輯

編輯者：香港新亞研究所敦煌學會

九龍農圃道六號

出版者：香港新亞研究所敦煌學會

九龍農圃道六號

定價：精裝港幣：六十元

美金：十二元

平裝港幣：五十元

美金：十元

一九七四年七月出版

版權所有 不准翻印